

Aatsitassanut inatsisip allangortinneqarnissaanut siunnersuummik UKA2022-mi saqqummiussinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, taamaalilluni inatsimmi § 1, imm. 2 ima oqaasertalerneqassalluni: “Ingerlatanik inatsimmut ilaasunik suliarinninnermi isumannaallisaaneq, peqqissuseq, avatangiisit, pisuussutinik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq”. § 83-mi oqaasertaliussa q “nunat tamat ileqqorisartagaat pitsaasut” aamma ”nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq”-mut aamma allangortinneqassaaq. Taamattaaq misissueqqaarnissanut qinnuteqaatinik paasissutissanik Naalakkersuisut tamanut saqqummiussisalernissaannik inatsimmi aalajangersagaliisoqassaaq, taamaaliornikkut piffinni innuttaasut soqutigisaqartullu allat, sapinngisamik siusinnerpaamik taamatut suliaqartoqarnissaanik ilisimasaqalersinnaaqullugit

Mariane Paviassenimit, Inuit Ataqtigiiit, saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Marianne Paviassen, Inuit Ataqtigiiit, siulittaasoq

Inatsisartunut ilaasortaq Lars Poulsen, Siumut, siulittaasup tullia

Inatsisartunut ilaasortaq Aqqalu Jerimiassen, Atassut

Inatsisartunut ilaasortaq Karl Tobiassen, Siumut

Inatsisartunut ilaasortaq Knud Mathiassen, Inuit Ataqtigiiit

Inatsisartunut ilaasortaq Harald Bianco, Inuit Ataqtigiiit

Inatsisartunut ilaasortaq Aslak Wilhelm Jensen, Siumut

UKA2021-mi ulloq 21. oktober 2021-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Aatsitassanut inatsimmi § 1, imm. 2-p aamma § 83-ip allannguutissaannik aalajangersimasunik saqqummiussinissamut Naalakkersuisut siunnersuutikkut pisussaaffilerneqarnissaat siunnersuuteqartup kissaatigaa, tamatumani oqaasertat ”nunat tamat ileqqorisartagaat pitsaasut” ”nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq”-mik taarserneqarnissaat kissaatigineqarluni. Tamatuma saniatigut misissueqqaarnissanut qinnuteqaatit tamanut saqqummiunneqarnissaannik qulakkeerinnittumik aatsitassanut inatsimmi aalajangersakkanik ilanngussisoqarnissaa siunnersuuteqartumit kissaatigineqarpoq, tamatumani siunertarineqarluni piffinni innuttaasut soqutigisaqartullu allat sapinngisamik siusinnerpaamik taamatut suliaqartoqarnissaannik ilisimasaqalernissaat.

Siunnersuutip Inatsisartunit siullermeerneqarnera

Aatsitassarsiornermik suliniutinut atatillugu innuttaasut siusissukkut akuutinneqartalernissaannik siunnersuutikkut siunertaq Inuit Ataqatigiinnit Naleqqamillu taparserneqarpoq. Taamatuttaaq najukkami innuttaasut avatangiisillu isiginiarneqarnerisa nukittorsaavigineqarnissaannik siunnersuuteqartup kissaataa taparserneqarpoq.

Aatsitassanut inatsimmi allannguutigittinniakkatut kissaatigisat pisariaqartinneqarnerannik ilanngunneqarsinnaanerannillu qulaajaanissaq siunertaralugu Atassut allannguutissatut siunnersuummik saqqummiussivoq.

Aatsitassanut aammalu avatangiisinut inatsisit qaffasissumik piumasaqarfioermata aammalu siunnersuutikkut sukaterniarneqartut aningaasaliisartut Kalaallit Nunaannut soqutiginninnerannik annikillisisisinnaammata siunnersuut Siumumit Demokraatinillu taparserneqanngilaq.

Ataatsimiititaliap siunnersuummik suliarinninnera

Inatsimmi atuuttumi allanngortinneqartussatut siunnersuuteqartumit kissaatigineqartut pingaarnernut marlunnut avinneqarsinnaasut ataatsimiititaliamit oqaatigineqassaaq:

- 1) Aatsitassanut inatsimmi atuuttumi inatsisip oqaasertaannik aalajangersimasunik allannguinnissaq. Inatsimmi atuuttumi (§ 1, imm. 2-mi), allassimavoq aatsitassarsiornermi ingerlatanik suliarinninnermi isumannaallisaaneq, peqqissuseq, avatangiisit, pisuussutinik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat “anguniarneqarpoq”. Oqaatsip “anguniarneqarpoq”-ip aalajangersakkamit peerneratigut tamatuma sukaterneqarnissaa siunnersuuteqartup kissaatigaa. Tamatuma saniatigut siunnersuuteqartup kissaatigaa aalajangersakkami innersuussut ”nunat tamat ileqqorisartagaat pitsaasut” ima allanngortinneqassasoq: ”nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq”. Tamanna § 1, imm. 2-mi aamma § 83-imi allanngortinneqassasoq kissaatigineqarpoq.
- 2) Aatsitassarsiornermik suliniutinut atatillugu ammasuunissap patajaallisarneqarnissaanut aammalu innuttaasunik annertunerusumik siusinnerusukkullu akuutitsilernissap qulakkeerneqarnissaanut aalajangersakkanik

inatsimmi ilanngussinissaq. Tassunga atatillugu misissueqqaarnissanut qinnuteqaatit pillugit paasissutissat tamanut saqqummiunneqartarnissaat pillugu inatsimmi aalajangersakkanik Naalakkersuisut ilanngussissasut siunnersuuteqartup kissaatigaa.

Avatangiisinut pitsaassusissat, innuttaasunik akuutitsineq ammasuunissarlu pillugit siunnersuummi isumaliutigineqartut aatsitassarsiornermut inatsisip allanngortinneqarnissaanik Naalakkersuisut suliaqarnissaanni ilanngunneqarumaartut Naalakkersuisut akissuteqaamminni oqaatigigaat ataatsimiititaliamit maluginiarneqarpoq. Paasissutissiissutigineqartut malillugit aatsitassanut inatsisip immikkoortunut marlunnut avinneqarnissaa Naalakkersuisut kissaatigaa, tassalu; aatsitassanut inatsit aamma annikitsumik aatsitassarsiornissamut inatsit.

Aalajangiiffigisassatut siunnersuut saqqummiunneqartoq pillugu akissuteqaamminni Naalakkersuisut paasissutissiissutigaaat "Kalaallit Nunaanni pissutsinut" pingaarnertigut ataatsimullu isigalugu innersuussinerup eqqoqqissaanngissinnaanera aarlerinaateqartoq, tassami tamanna atugassarititaasunik sukannernerusunik qasukkaanerusunillu kinguneqarsinnaammat. Nangillunilu allassimavoq "Nunani tamalaani suleriaatsimut pitsaanerpaamut" innersuussinermut tunngatillugu, pisuni ataasiakkaani nunani tamalaani suleriaatsip pitsaanerpaap suunerata ersarittannginnera anigorniagassaasoq. Taamaattumillu taamatut oqaasertaliinerup paasineqarnissaa nalilersorlugu suliaqarneq Naalakkersuisut aallartereeraat.

Tamanna tunngavigalugu allannguutissatut siunnersuut una Naalakkersuisunit saqqummiunneqarpoq:

Inatsisartunit aalajangigassatut siunnersuut, Naalakkersuisut peqquneqassasut inatsisiliassami qulakkeerneqassasoq isumannaallisaanermi avatangiisinullu tunngasuni piumasqaateqassasoq qaffasinnerpaanik innuttaasunillu akuutitsinerulertoqassasoq ammanerulertoqarlunilu.

Naalakkersuisut oqaatigaaat allannguutissatut kissaatigineqartut isiginiarneqassasut kiisalu siunnersuuteqartoq Naalakkersuisunit isumaqatigineqartoq, eqqoqqissaartumilli oqaasertaliinissaq isumaliutersuutigineqassasoq. Aatsitassanut inatsimmut atuuttumut taartissatut inatsimmik nutaamik suliaqarnermi oqaasertanik aalajangersimaqqissaartunik atuinissamut Naalakkersuisut pituttorneqarneqarnissaat isumatusaarnerugunangimmat ataatsimiititaliamit oqaatigineqassaaq. Taamaattumillu Naalakkersuisut allannguutissatut siunnersuutaat ataatsimiititaliamit paasinnittumik pissuseqarfigineqarpoq. Tassunga atatillugu oqaatigineqassaaq suliniummut ingerlasumut, aalajangiiffigisassatut siunnersuutip aalajangersimasup imarisaanut tunngasunik imaqartutut isigineqartumut, aalajangiiffigisassatut siunnersuutip ilanngunneqarnissaanik Naalakkersuisut kissaateqartarnerat nalinginnaasuummat. Inatsisissatut missingiummik nutaamik saqqummiussinissaminnut piareerunik aalajangiiffigisassatut siunnersuummi matumani kissaatit qanoq tigussaasumik ilanngunneqarsimanerat erseqqissaqqullugu Naalakkersuisut ataatsimiititaliamit

kaammattorneqarput, taamaaliornikkut tusarniaaffigineqartut minnerunngitsumillu Inatsisartut tamatuminnaga naliliiffiginmissinnaaqullugit isummerfiginnissinnaaqullugillu.

Naalakkersuisunit inatsisissatut siunnersuutigineqarniartut Inatsisartunut kingusinnerpaamik UKA2022-mi saqqummiunneqarnissaat Inuit Ataqatigiinnit kissaatigineqarmat ataatsimiititaliami ikinnerussuteqartut Inuit Ataqatigiit erseqqissarumavaat. Taamaattumillu allannguutissatut siunnersuut una ikinnerussuteqartunit saqqummiunneqarpoq:

Inatsisissap ilusilerneqarnerani isumannaallisaanermut avatangiisinullu piumasaaqatit qaffasissuunissaasa aammalu innuttaasunik akuutitsinerup ammasuunissallu annertusitinneqarnissaasa qulakkeerneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsit UKA2022-mi Inatsisartunit suliarineqartussanngorlugu saqqummiunneqassaaq.

Taamatuttaaq siullermeerinninnermut atatillugu Atassut allannguutissatut siunnersuummik saqqummiussivoq:

Siunnersuutigineqartutut inatsimmik sukaterinerup pitsaaqutaasa ajoqutaasalu nassuiaatigineqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat Inatsisartunut kingusinnerpaamik UKA2022-mi saqqummiunneqassaaq, tamatumalu kingorna inatsimmik allannguinnissaq piviusunngortinneqassanersoq aalajangiiffigineqassaaq.
[Ataatsimiititaliamit (KAL/DA) nutsigaq]


Inatsimmik allannguinerit tamaasa allannguinerup kingunerisa nassuiaatigineqartarnissaat ataatsimiititaliamit tunngaviusumik isumaqatigineqarpoq. Pitsaaqutinik ajoqutaasunillu naliliineq kingunerisanik qulaajaanerup tamatuma pissusissamisoortumik ilagaa. Taamaattumillu Naalakkersuisut allannguutissatut siunnersuutaat akuerineqassappat Atassutip allannguutissatut siunnersuutitut saqqummiussaa tassunga ilaatinneqassaaq, tassami Naalakkersuisunit allannguutissatut siunnersuutaanni siunnersuuteqartup sukaterinissamik kissaatai aatsitassanut suliassaqarfimmi inatsisissamik nutaamik suliaqarnermi Naalakkersuisunit ilanngunneqassamaarmata.

Ataatsimiititaliap inassuteqaatai

Ataatsimiititaliami ikinnerussuteqartut Inuit Ataqtigiit ilaasortaatitaasa allannguutissatut siunnersuutip Inuit Ataqtigiinnit saqqummiunneqartup **akuersissutigineqarnissaa** inassutigaat.

Ataatsimiititaliami amerlanerussuteqartut Siumup Atassutillu ilaasortaatitaasa allannguutissatut siunnersuutip Atassummit saqqummiunneqartup **akuersissutigineqarnissaa** inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




Mariane Paviasen
Siulittaasoq



Lars Poulsen
Siulittaasup tullia




Aqqalu Jerimiassen



Karl Tobiassen



Knud Mathiassen



Harald Bianco



Aslak Wilhelm Jensen